

Gian Darms – noss mister bulletin da lavalinas

■ (rtr) El è mintga venderdi a las 17.50 sin RR: Gian Darms è prognosticher da lavalinas al WSL Institut per la perscrutaziun da la naiv e las lavalinas SLF a Tavau. Dapi tschintg onns lavura el en il team dals prognostichers che fan il bulletin da lavalinas – il product il pli enconuschent dal SLF. Gian Darms è prognosticher da lavalinas cun corp ed olma. Dapi tschintg envierns fa il geograf da Ruschein bulletins da lavalinas per il SLF a Tavau. El è in dals dus responsabels per la scolaziun dals 200 observaturs da lavalinas che il SLF ha en tut la Svizra.

Durant l'enviern fa el mintga venderdi a las 17.50 il bulletin da lavalinas

Suentermezdi a las 15.00: Era per Gian Darms è briefing en la stanza dal bulletin da lavalinas. Frank Techel, il prognosticher en servetsch, lavura gia dapi la bun'ura a las 05.30. El ha fatg l'emprim bulletin a las 08.00 ed ha suenter ramassà tutta di observaziuns e mesiraziuns. Ussa preschenta el la basa da datas al prognosticher Gian Darms e tut tenor situaziun da privel da lavalinas er al schef, a Thomas Stucki.

La prognosa cumenza cun in sguard enavos

Auter che tar ils meteorologs ha il sguard enavos ina grond'impurtanza. Basa per far la prognosa è l'analisa da la situaziun actuala: quanta naiv, quant vent e tgeninas temperaturaturas hai dà nua e tgeninas consequenzas aveva tut quai per la cuverta da naiv? Co sa mussa quella, co è sia consistenza e tge vegn a succeder cun ella en vista a las prognosas da l'aura actualas?

Gian Darms è dapi tschintg onns en uffizi. Ils emprims dus envierns, da november enfin matg, è el stà da la partida per exercitar. Uss, suenter tant temp, sa sentia el segir, di Darms. Ed el è anc adina fascinà dal tema bulletin da lavalinas.

Emprima analisa da datas

En l'instrument «Aktuell++» ramassa il prognosticher responsabel en servetsch – oz Frank Techel – tut las datas. Quellas tanschan da las observaziuns enfin mesiraziuns e models dad aura externs. «Aktuell++» ha il SLF sviluppa sez aposta per



Noss mister bulletin da lavalinas a la lavur.

MAD

quel diever. Era quai ina lavur che vegn fatga en chasa per il product il pli enconuschent dal SLF, il bulletin da lavalinas.

Las datas vegnan cumpletadas cun quellas dal program meteorologic «Meteo Viewer» e dal bulletin da lavalinas dals collegas a Chamonix (F). Quels publitgeschan gia a las 15.00. En cadenza main stretga seguan ils contacts cun ils auters prognostichers da lavalinas ad Innsbruck (A) ed a Balsaun (I).

Il briefing cuminaivel è la basa per il bulletin da lavalinas

Tut quai ha Techel, il prognosticher en servetsch, gia preparà. Uss, tar l'inscunter cun ses collegas, vegn congualà, argumentà e debattà enfin suenter las 16.00 per rivar a la versiun finala.

In algoritmus, ina furmla matematica, na rivass betg uschè svelta da substituir els, è il schef dals observaturs, Thomas Stucki, persvadi. Sper tut las datas ed ob-

servaziuns sajan anc adina l'egl e l'analisa umana la basa per il bulletin da lavalinas. Era Darms è da quell'idea.

Ina visita en la stanza dal bulletin mussa quai: I vegn discutà minuziusamain, validità datas, observaziuns e models. Il «wumm» ch'in observatur ha udì en la cuverta da naiv na sa intermediar nagina mesiraziun electronica.

Curt avant las 17.00 è il bulletin pront. Ils prognostichers en servetsch han discutà e controllà tut anc ina giada. Els han fatg ina redacziun exacta dal text per ch'ils traducturs sappian far lur lavur. Quels han da pudair translatar uschia exact en englais, talian e tudestg, ch'i na dat nagina differenza tar la versiun tudestga.

En il bulletin da lavalinas dad RTR il venderdi, a las 17.50, ma era sin auters chanals, en la rait e cun la app «White Risk» segua uss la publicaziun dal bulletin nov.

La rolla dal bulletin da lavalinas s'ha midada

Il bulletin da lavalinas ha l'incumbensad orientar la populaziun dal privel. Ina giada pertutgava el en emprima lingia las vischnancas e las vias en muntogna. Oz s'interessa per 90% il turissem per el.

L'analisa resta la medema – ed ella trenna e prepara ils prognostichers a situaziuns da privel extraordinarias, nua ch'il bulletin accumplescha danovamain sia rolla primara: Numnadamain dad esser la basa per decider da serrar vias u dad evacuar chasas e vischnancas.

Nagin squitsch dals territoris da skis

La naiv è vegnida in factur economic. Quai mussa quest enviern danovamain cler e bain. Il squitsch economic na tanschia dentant betg fin tar els, di Stucki: «Qua stattan ils responsabels en il lieu sin squitsch bler pli aut». Il SLF fa ils bulletins per il territori liber, betg per

quels da skis – là datti agens responsabels.

Il bulletin vegn fatg dapi il 1945. Dumondas da regress pervi da prognosas faussas n'ha haja anc mai dà. «Jau prov da far la lavur uschè bain sco quai che jau sai» – quai dettia la segirezza, raquinta Darms. E sch'i avess dad ir ina giada dir sin dir «stoss jau mussar si che jau hai lavurà conscienziusa- e correctamain». E la fin dals quint: igl è ina prognosa. Quella confruntia tuttina cun malsegirezzas.

... e nagin sustegn per il HCD

Sper tut la seriusadad han ils prognostichers mintgatant era da rir.

Discussiuns pli vivas dettia magari cura ch'il Club da hockey dad Ambri gioga: Il reglament da diever da lur halla, la Valascia, prevesa ch'i na dastga dar nagin giu en cas da privel da lavalinas 4.

Fans dal HCD u betg – ils prognostichers dal SLF èn e restan profis tras e tras.